


Ano ba ang Karapatan ng Bata?

Narinig nyo na ba ang “Kasunduan ukol sa Karapatan ng Bata” ? Ito ay ang naitatag na kasunduan ukol sa karapatan ng lahat ng bata sa buong mundo. May mga kabataan na naiipit sa gitna ng digmaan, binabawian ng buhay sanhi ng sakit na maaari sanang maiwasan, gumagawa ng mabigat na trabaho para sa kanilang murang edad at nakakaranas ng lubos na hirap sa kanilang pang-araw araw na pamumuhay.

Kakampi ng mga kabataang ito at lahat ng kabataan sa mundo ang kasunduan ukol sa karapatan ng bata.

Mayroon 54 na itinakdang kundisyon na nahahati sa mga sumusunod na 4 na karapatan na kailangang pangalagaan.

1 Karapatan na Mabuhay




Pangalagaan ang buhay ng lahat ng bata

2 Karapatan na Arugain



Makatanggap ng tulong pang-medikal, pang-edukasyon at sa pang-araw araw na pamumuhay, makipaglaro sa mga kaibigan at mahasa ang angking kakayahan

3 Karapatan na Protektahan



Protektahan mula sa pananakit, pang-aabuso at mapanganib na pagtrabaho

4 Karapatan na Sumali



Malayang makapagpahayag ng opinyon at bumuo ng grupo

Pagpapakila ng Ilang Bahagi ng Karapatan ng Bata

Artikulo 1 Kahulugan ng Bata Ang isang tao na wala pang 18 taong gulang.

Artikulo 2 Pagbabawal sa Diskriminasyon Ang lahat ng bata ay pantay pantay na may karapatan sa kasunduan. Ang mga bata ay hindi dapat makaranas ng diskriminasyon alinmang bansa ang kanilang pinagmulan, ano man ang kanilang kasarian, ano man ang kanilang salita, ano mang relihiyon ang kanilang pinaniniwalaan, may pagkakaiba man sa kanilang opinyon, mayroon man o wala silang pisikal o mental na kapansanan, ano man ang kanilang katayuan sa buhay at uri ng magulang mayroon sila.

Artikulo 3 Bagay na Makakabuti para sa mga Bata Sa alin mang gawain na may kinalaman sa mga bata, pinakamahalagang isipin kung ano ba ang makabubuti sa kanila.

Artikulo 6 Karapatan na Mabuhay at Arugain Ang lahat ng bata ay may karapatan na mabuhay at arugain.

Artikulo 12 Karapatan na Ipahayag ang Opinyon Ang bata ay may karapatan na malayang ipahayag ang kanilang opinyon pagdating sa mga bagay na may kinalaman sa kanilang kapakanan. Kinakailan na isa-alang alang ang kanilang opinyon pagdating sa kanilang paglaki.

Artikulo 16 Pangalagaan ang Kanilang Pribadong Impormasyon at Karangalan Pangalagaan ang pribadong impormasyon pagdating sa kanilang pagkatao, pamilya, tirahan telepono at pribadong sulat. May karapatan din sila na hindi mayurakan ang kanilang pagkatao ng ibang tao.

Artikulo 19 Protektahan mula sa Pang-aabuso Ang pamahalaan ay kailangang protektahan ang bata na hindi sila makaranas ng alin mang uri ng pang-aabuso at pangmamaltrato habang pinapalaki ng kanilang mga magulang.

Artikulo 23 Batang may Kapansanan Ang mga batang may mental o pisikal na kapansanan ay may karapatan na pangalagaan ang kanilang dignidad, mamuhay ng malaya at aktibong miyembro ng komunidad, makapag-aral at makapagsanay at tumanggap ng serbisyong pang-seguro.

Artikulo 28 Karapatan na Tumanggap ng Edukasyon Ang bata ay may karapatan na makapag-aral. Tungkulin ng pamahalaan na mapag-aral ng elementarya ang lahat ng kabataan. Lahat ng bata ay kinakailangang bigyan rin ng pantay na pagkakataon na ipagpatuloy ang kanilang pag-aaral sa mataas na paaralan. Kinakailangan isa-alang alang na ang dignidad ng bata ay hindi maisawalang bahala sa pagpili ng kanilang paaralan.

Artikulo 31 Karapatan na Makapagpahinga at Makapaglaro Ang mga bata ay may karapatan na makapagpahinga, makapaglaro at makalahok sa mga gawaing pang-kultura.

Pinagkuhanan: [Aklat ukol sa Kasulatan ng Karapatan ng Bata] Inilathala ng Japan Committee for UNICEF at impormasyon mula sa website ng Japan Committee for UNICEF

Kung nais ninyong palawakin pa ang inyong kaalaman...

Pahalagahan natin lahat ang pansariling karapatan ng bata ayon sa mga itinakda sa kasunduan ukol sa karapatan ng bata. Bigyan din natin ng katumbas na halaga ang karapatan ng ibang tao. Sapagkat ang pantay pantay na pagpapahalaga sa lahat ay ang pangunahing batayan ng pagiging tao. At kapag tayo ay sumapit na sa wastong edad, pagnilayan natin kung ano ba ang mga dapat gawin upang maisakatuparan natin ito. Para sa mga nagnanais na palawakin ang kanilang kaalaman, sumangguni sa website na nakasulat sa ibaba.

Japan Committee for UNICEF Website [Kasunduan ukol sa Karapatan ng Bata]

<https://www.unicef.or.jp/kodomo/kenri/>

Website ng Kasunduan ukol sa Karapatan ng Bata sa iba' t ibang wika.

<https://boes.org/multilingual/>

<https://www.pref.shizuoka.jp/kousei/ko-130/jidounokenrijouyaku.html>

* Ang kasunduan ukol sa karapatan ng bata ay ipinatupad sa bansang Hapon noong ika-22 ng Mayo, 1994